

**REGIONAL NEWS BULLETIN
HEADLINES (EVENING)**

Date – 25/11/2024

Time - 18:30 -18:40Hrs

- Ramsain ranvulh a tihlum sak te zangnadawmna a pek thin a tihsan chu ranvultuten an tangkaipui a beisei thu AH & Vety Dept chuan a sawi.
- Manipur state chhung buaina avanga Churachandpur leh a chhehvela FCI Aizawl in buhfai a thawn thin chu tluang taka la kalpui zel a ni.
- Prime Minister Narendra Modia chuan vawiin khan ICA Global Cooperative Conference New Delhi ah a hawng.
- Vawiin khan Parliament thlasik thutkhawm tan a ni.

<><><>

AH& VETY

Animal Husbandry & Veterinary (AH&Vety) department Director Pi R. Zothanmawii chuan tunhnaia Mizoram sorkarin ramsain ranvulh a tihlum sak te zangnadawmna a pek thin a tihsan chu ranvultuten an tangkaipui a beisei thu Akashvani a hirih.

Akashvani Corr nen an inkawmnaah AH& Vety Director chuan hmun thenkhata ran vulhtu, a bik takin sial vulhtute, an sial vulh ramsa in a tihlum sak avanga harsatna an tawh thin thu a sawi a. Hei hi ranvulhtute tan channa nasa tak a nih thu a sawi a. Zangnadawmna lo pek tawh thin chuan an harsatna eng emaw chen sukiang mahse an ran hlutna tehin a beitham thin a. Tunhnaia Chief Minister hoa State Board of Wildlife thutkhawm vawi 10-na in zangnadawmna a pek thin a tisang chu lawmawm a tih thu leh helama harsatna tawk te tan thil tangkai tak a nih a beisei thu a sawi a ni.

State Board of Wildlife in zangnadawmna rate thar a siamah chuan ramsa in a tihlum Sial leh bawnga cheng 37,500 a pek thin chu kum khat hnuailamah cheng 40,000 leh kum 1 aia upaah cheng 80,000-ah tihpun a ni a. Tlangram bawng (hill cattle)-a cheng 37,500 pek thin chu kum 1 hnuailamah cheng 15,000-ah leh kum 1 aia upaah cheng 30,000 in a tidanglam bawk a. Ramsain vawk a tihlumah kum 1 hnuailamah cheng 15,000 leh kum 1 aia upaah cheng 40,000 pek thin a ni ang a. Kel leh beram a tihlumah cheng 4000 pek thin chu kum 1 hnuailamah cheng 2000 leh kum 1 aia upaah cheng 5000 pek a ni tawh ang a, ar bikah cheng 100 pek thin chu kum 1 hnuailamah cheng 100 leh kum 1 aia upaah cheng 300 a ni tawh dawn a ni. Hei bakah hian ran vulna in tihchhiata cheng 3000 pek thin chu, a chhunga an vulh ran kum 1 hnuailam a nih chuan cheng 40,000 leh kum 1 aia upaah cheng 80,000 pek a ni tawh dawn a ni.

<><><>

NCC DAY

Chief Minister Pu Lalduhoma'n Mizorama NCC hmasawn zel chuan Mizo thalai tam tak Armed Forces ah awlsam zawkin officer ah an luh theih phah a ti.

He thu hi nimina National Cadet Corps Day vawi 76-na puala social media page instagram kaltlanga NCC Cadet leh a thawktute chibai a bukna ah sawiin Chief Minister chuan Mizorama NCC chuan hma a sawn zel a ti a, thalai tam tak sipai officer an nih theihna chu a hlu tih sawiin heng bakah sawrkar leh mipui vantlang tan thil tha tam tak an ti thin a ti a, zirna in hrang hranga NCC din belh zel

mamawhna a pung zel tih sawiin hemi phuhru thei tur hian Ministry of Defence chuan NCC cadet awmsa nuai 17 atangin nuai 20-ah a tipung chho mek a ti bawk.

NCC din champha phak vawi 76-na pual hian Lunglei hnuai cadet-te chuan inrinni khan thisen unit 22 an pe a, thisen pek runpui hi 2 Mizo Bn NCC hmunpui, Lunglei Sazaikawna Multipurpose Building-ah buatsaih a ni a. Thisen hi college leh school hrang hrang atanga NCC cadet kal khawmte'n pein, 2 Mizo Bn NCC Commanding Officer Col. Aman Chowdhary chuan a telpui a ni.

2 Mizo Bn NCC hian Mizoram chhim lam pumpui awpin, Mizoram chhim lama NCC battalion awm chhun a ni a. College leh school hrang hranga NCC cadet-te tan training leh activity hrang hrang an buatsaih thin a ni.

<><><>

FCI

Manipur state chung buaina avanga Churachandpur leh a chhehvela Food Corporation of India (FCI) Aizawl Divisional Office in buhfai a thawn thin chu tluang taka la kalpui zel a ni a,

FCI Aizawl Divisional Manager Pi Zodinpui Ralte chuan Churachandpur-a buhfai an thawn tan nikum June thla atanga tun November thla thlengin buhfai quintal nuai 1 sing 7 sang 9, 565 chuang hret a nih thu a sawi a. Sorkar laipui atanga titawp tura an rawn tih lemloh chuan pek chhuzawm zel a ni dawn a ti.

Pi Zodinpui Ralte chuan Churachandpur-a buhfai an pek thinah Mizoram sorkar pawhin theitawp an chhuah pui tih a sawi a. Bairabi-a rel a lo thlen apiangin truck 20 atanga 30 vel bawrin an thiar chho ziah tih sawiin rel-a wagon an dawn zat milin ruahmanna mumal tak hnuaipek chhoh thin a ni a ti a. Fur laia kawng a chhiat nasat lai pawha tlawmngai taka buhfai phur thin tu truck khalhtute leh neitute chungah an lawm hle tih a sawi bawk a ni.

Churachandpur-ah hian an state chhunga buaina a chhuah avangin sorkar laipui chuan Food Corporation of India, Aizawl Divisional Office hnenah buhfai thawn thin turin a hriattir a. Nikum June thla khan buhfai quintal 8566 chuang hret thawnin bul an tan a, an thawn hnuhnun ber, tun thla bikah quintal 10,541 chuang hret an thawn thung a ni.

FCI Aizawl Divisional Manager chuan Churachandpur hian Manipur state khawpui Imphal lam atangin buhfai an dawn theih loh thu a sawi a. Jiribam, Assam lamah rel thleng ve tho thin mahse Imphal paltlang a ngaih avangin helam kawng atang hian buhfai phurh luh theih a nih loh thu a sawi bawk a ni.

<><><>

MOU

Mizoram sorkar dialysis centre hrang hranga haemodialysis khawl 21 dah na tur atan Indian Oil Corporation Limited, Mizoram National Health Mission leh Fairfax India Charitable Foundation ten inremna an ziaik.

He khawl Indian Oil Corporation Limited in vantlang tana an hnathawh, Corporate Social Responsibility hnuai atanga pek tur niin Fairfax India Charitable Foundation in an thawhpui dawn bawk a. Fairfax India Charitable Foundation hian Mizorama heng khawl 21 te dah hna hi an thawk dawn a ni. Inremna an ziaha a lan danin heng khawl 21 Mizoram sorkar Dialysis Centre hrang hranga dah tur hian Indian Oil Corporation Limited chuan cheng vbc 1 nuai 47 sing 5 sang 4, 719 an seng dawn a ni.

<><><>

FIT INDIA WEEK

Aizawl West III Bialtu MLA Pu VL Zaithanzama hoin vawiin khan Sports Authority of India (SAI) bultuma buatsaih Fit India Week, 2024 chu Govt. Mamawii Higher Secondary School, Aizawlah hawn a ni.

Fit India Week, 2024-ah hian Mizoramah chuan volleyball, quiz leh painting hmang tein intihsiaik a ni a. Yoga leh meditation pawh huaihawt niin vawiina pungkhawm te hian Fit India thutiam an sawirual bawk a ni.

Fit India Week hi ram pumah Ministry of Youth Affairs & Sports leh Ministry of Education tangkawpin kum 2019 atang khan buatsaih a ni a. Kumin Fit India Week hi ram pumah tun thla ni 15 atanga thla thar December ni 31 inkara neih turin ruahman a ni.



PC PARTY

PC Party chuan ZPM kaihhruai sorkar chu khaw hrang hranga party dang kaihhruai VC te thawhpui tha duh lo ah a puh a, tuna VC term an pawhtawi chhan chu sawhthing hralhna an hre dawn lova an inhriat vang niin a lang an ti.

Mizoram sorkarin Village Council term a pawh tawi chu sut leh se an duh tih vawiina an thuchhuahah sawiin, PC Party chuan party dang kaihhruai sorkar ten an sorkar din hmaa lo ding tawh VC te tha taka an thawhpui mai thin laiin ZPM Minister leh MLA ten opposition VC te an thawhpui that theih loh thu vantlang hriatah an sawi fova, VC leh mipui an vau fo ni a sawiin hetiang sorkar chakna hmanga mipui vaubet chung a VC tam tak neih tuma sorkarin hma a la hi a pawiin a tha lo tak zet a ni an ti.

Dan hmangin, Cabinet thutlukna hmangin, chhan tha tawk awmin VC term hi pawhtawi theih a ni ngei tih sawiin PC Party chuan hetihlaia tuna VC term an pawhtawi dan hi Dan kalh a nih thu leh High Court a inrawlh chuan sorkar a buai viau dawn an ti a. Hetiang mai maia mipui thlan tlin te zahpah lo taka sorkar a che chu an dem thu leh, an thutlukna chu sut leh ngei tura na ngen thu an sawi a ni.

Vawiina thuchhuah an siamah PC Party chuan Democracy sorkar lungphum pawimawh ber zing ami chu khawtual inawpna (Village Council leh Municipality) a ni a, hei hi India sorkarin a ngaih pawimawh zual tak avanga VC term atan hian MLA leh Municipality term anga kum 5 hman a nih thu an sawi a. Hei bakah hian sorkar hmalaknaah khawtual inawpna te ngaih pawimawh zual chhoh zel niin heng khawtual inawpna pual hian Central sorkar chuan a hranpa ngatin pawisa pawh a dah hrang an ti a. Central duh dan anga khawtual inawpna te la dah pawimawh loh avang hian fund pawh central atanga hmuh theih tur hmuh loh a la awm teuh a ni an ti.



AIR ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.



ICA

Prime Minister Narendra Modia chuan vawiin khan ICA Global Cooperative Conference chu Bharat Mandapam, New Delhi ah a hawng. Kum 130 hnua a wavi khat nan International Cooperative Alliance (ICA) Global Conference hi India ah nghah a ni a. He ni pual hian Pu Modia chuan ICA 2025 hriatrengna stamp a tlangzarh bawk a ni. He Conference ah hian Bhutan Prime Minister, Dasho Tshering Tobgay, Fiji Deputy Prime Minister, Manoa Kamikamica te pawh an tel a ni.

ICS Global Conference hi Indian Farmers Fertiliser Cooperative Limited, ICA,
sawrkar laipui leh Indian Cooperatives AMUL, leh KRIBHCO ten an buatsaih a ni.



GOLD

Mumbai Airport-ah rangkachak 4Kg-a rit cheng vaibelchhe 2 leh nuai 714 hu man a ni. Air Intelligence Unit te chuan an thudawn bawhzuiin Chhatrapati Maharaj International Airport ah hian rangkachak hi an man a. Dubai atanga lo phurh luh niin Male panpui tur nia hriat a ni a. He thila mawhphurtu mi pahnih pawh man nghal a ni bawk.

(Newsonair)



Vawiin khan Parliament thlasik thukhawm tan a ni a. Opposition ten sumdawng pawl pakhat hlemhletna chungchang leh buaina dang avangin house thukhawm hi rorel thei loin an siam a. Hei vang hian rorel inkhawm hi vawiin atan tihtawp zui a ni.

Rajya Sabha-ah chuan chairman Jagdeep Dhankar chuan opposition memberte chu house in tluang taka hna a thawh tir turin a ngen a. Chairman ngenna hian awmzia a neih loh avangin rorel inkhawm hi vawiin atan tihtawp zui a ni.

(Byte)

Lok sabha-ah pawh opposition memberten rorel thei loa an siam avangin chhun dar 12 khan vawiin inkhawm chu tihtawp a ni bawk.

Opposition Memberte hian sumdawng pawl pakhat hlemhletna chungchang leh Manipur buaina bakah thildang sawiho an ngiat a ni.

(Newsonair)

<><><>